



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ
Ո Ր Ո Շ ՈՒ Մ**

23 հոկտեմբերի 2019 թվականի №398Ա
քաղ. Երևան

**«ՄՏՍ ՀԱՅԱՍՏԱՆ» ՓԱԿ ԲԱԺՆԵՏԻՐԱԿԱՆ ԸՆԿԵՐՈՒԹՅԱՆ ՆԿԱՏՄԱՍԲ ՏՈՒՅԺ
ԿԻՐԱՌԵԼՈՒ ԵՎ ԸՆԿԵՐՈՒԹՅԱՆ ԳՈՐԾՈՒՆԵՈՒԹՅՈՒՆԸ ԿԱՆԽՈՐՈՇԵԼՈՒ
ՀՆԱՐԱՎՈՐՈՒԹՅՈՒՆ ՈՒՆԵՑՈՂ ԱՆՁԻ ԲԱԺՆԵՏՈՄՍԵՐՆ ՕՏԱՐԵԼՈՒՆ
ՀԱՄԱՁԱՅՆՈՒԹՅՈՒՆ ՏԱԼՈՒ ՄԱՍԻՆ**

Հաշվի առնելով՝

ա) «Էլեկտրոնային հաղորդակցության մասին» օրենքի 14-րդ հոդվածը, որի համաձայն՝ ցանցի լիցենզիա ստացած անձի բաժնեմասի նկատմամբ իրավունքի օտարում կարող է իրականացվել միայն Հայաստանի Հանրապետության հանրային ծառայությունները կարգավորող հանձնաժողովի (այսուհետ՝ Հանձնաժողով) համաձայնությունը կարգավորվող անձի կողմից ստանալուց հետո,

բ) «ՄՏՍ ՀԱՅԱՍՏԱՆ» փակ բաժնետիրական ընկերության (այսուհետ՝ Ընկերություն) 2019 թվականի սեպտեմբերի 18-ի №MH/L190701/1.0/RV գրությունը, որի համաձայն՝ նպատակահարմարությունից ելնելով՝ «ՄՏՍ» ՀԲԸ-ի կողմից որոշվել է, որ Մուսսա և Պիեր Ֆաթուլյաներին պատկանող «ԱՐԱՄԱՅՈՒՆ ԻՆՎԵՍՏՄԵՆՏԻՍ ԼԻՄԻԹԵԴ» ընկերության բաժնետոմսերի 20 տոկոսի նկատմամբ գնման օպցիոնի իրավունքը կիրառվի «ԱԼԼԵԳՐԵՏՏՈ ՀՈԼԴԻՆԳ» սահմանափակ պատասխանատվությամբ ընկերության կողմից, որի 100 տոկոս բաժնետոմսը պատկանում է «ՄՏՍ» ՀԲԸ-ին: «ԱԼԼԵԳՐԵՏՏՈ ՀՈԼԴԻՆԳ» սահմանափակ պատասխանատվությամբ ընկերությանն է փոխանցվել նաև «ՄՏՍ» ՀԲԸ-ին պատկանող «ԱՐԱՄԱՅՈՒՆ ԻՆՎԵՍՏՄԵՆՏԻՍ ԼԻՄԻԹԵԴ» ընկերության բաժնետոմսերի 80 տոկոսը: Միաժամանակ Ընկերությունը խնդրել է համաձայնություն տալ իր միակ բաժնետեր «ԱՐԱՄԱՅՈՒՆ ԻՆՎԵՍՏՄԵՆՏԻՍ ԼԻՄԻԹԵԴ» ընկերության 100 տոկոս բաժնեմասը «ՄՏՍ» ՀԲԸ-ին 100 տոկոսով պատկանող և վերջինիս կողմից լիովին վերահսկվող ու կառավարվող «ԱԼԼԵԳՐԵՏՏՈ ՀՈԼԴԻՆԳ» սահմանափակ պատասխանատվությամբ ընկերությանն օտարելուն (այսուհետ՝ Գործարք): Ընկերությունը հայցել է Հանձնաժողովի

ներողամտությունը Գործարքի իրականացման համար համաձայնություն ստանալու նպատակով նախապես չդիմելու համար՝ պատճառաբանելով, որ չի հանդիսացել դրա կողմ, չի ունեցել այդ գործընթացի վերահսկման հնարավորություն և այդ մասին տեղեկացվել է միայն կատարումից հետո,

զ) որ Հանձնաժողովը, հիմք ընդունելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի «բ» կետը, 2019 թվականի սեպտեմբերի 23-ից վարչական վարույթ է հարուցել Ընկերության նկատմամբ՝ առանց Հանձնաժողովի համաձայնությունն ստանալու բաժնեմասի նկատմամբ սեփականության իրավունքն այլ անձի փոխանցելու փաստն ուսումնասիրելու նպատակով, որի մասին Ընկերությունը ծանուցվել է 2019 թվականի սեպտեմբերի 23-ի №ՄՇ/34.2-Մ2-10/2612-19 գրությամբ,

դ) ի պատասխան Հանձնաժողովի 2019 թվականի սեպտեմբերի 23-ի №ՄՄ/34.2-Մ2-10/2613-19 գրության ներկայացված Հայաստանի Հանրապետության բարձր տեխնոլոգիական արդյունաբերության նախարարության 2019 թվականի հոկտեմբերի 17-ի №03/11.1/11116-2019 գրությունը, համաձայն որի՝ նախարարությունը չի առարկում Գործարքին,

ե) որ Ընկերությունը հարուցված վարչական վարույթի շրջանակում 2019 թվականի սեպտեմբերի 30-ին Հանձնաժողով ուղարկված №MH/L190742/1.0/RV գրությամբ հայտնել է, որ ուսումնասիրվող հարցի կապակցությամբ լրացուցիչ հիմնավորումներ չունի,

զ) որ հարուցված վարչական վարույթի շրջանակում փաստվել է, որ Ընկերությունը խախտել է «Էլեկտրոնային հաղորդակցության մասին» օրենքի 14-րդ հոդվածի պահանջները, ինչպես նաև այն, որ Գործարքի արդյունքում չի փոխվել Ընկերության փաստացի սեփականատերը և կարգավորվող անձի գործունեությունը կանխորոշելու հնարավորություն ունեցող անձը, և

հիմք ընդունելով «Էլեկտրոնային հաղորդակցության մասին» օրենքի 5-րդ հոդվածի 1-ին մասի 2-րդ կետի «ժբ» ենթակետը, 54-րդ հոդվածի 2-րդ մասի 1-ին կետը, 63-րդ հոդվածի 2-րդ մասը՝ Հանձնաժողովը **որոշում է.**

1. «Էլեկտրոնային հաղորդակցության մասին» օրենքի 14-րդ հոդվածը խախտելու համար Ընկերությանը ենթարկել տույժի՝ երկու միլիոն (2 000 000) ՀՀ դրամ գումարի չափով:
2. Համաձայնություն տալ Գործարքին:
3. Ընկերությանը՝ սույն որոշումն ուժի մեջ մտնելու պահից 30-օրյա ժամկետում №900005242319 հաշվեհամարով Հայաստանի Հանրապետության պետական բյուջե վճարել սույն որոշման 1-ին կետով սահմանված տույժը:

4. Ընդունել ի գիտություն, որ Ընկերությունն իրավասու է՝

- 1) սույն որոշման հրապարակումից հետո երեսուն օրվա ընթացքում միջնորդել Հանձնաժողովին՝ վերանայելու իր որոշումը.
- 2) սույն որոշումն ուժի մեջ մտնելու պահից երկամսյա ժամկետում դիմել Հայաստանի Հանրապետության վարչական դատարան:

5. Սույն որոշումն ուժի մեջ է մտնում Ընկերությանն օրենքով սահմանված կարգով իրազեկելու օրվան հաջորդող օրվանից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ
ՀԱՆՁՆԱԺՈՂՈՎԻ ՆԱԽԱԳԱՀ՝**

ք. Երևան
23 հոկտեմբերի 2019թ.

